

Hiber. III Tab. Orientalem Ultoniæ partem continens,

& sequentia territoria,

Clandeboy, Tirone, Arde, Lecale, Evaugh, Arthule, Newry, Mourne, Fufe, Uriel, & alia plura.

LAGENIA.

Regio.
Nomina.

Soli fertilitas.

MEDIAM in nostri authoris partitione sequitur *Lagenia* quarta Hiberniæ pars, Incolis *Leighnig*, Britānis *Lein*, Anglis *Leynster*, Scriptoribus Latinis *Lagenia*, in antiquis Sanctorum vitis *Lagen*. Tota maritima ad ortum Hiberniæ jacet, a Momonia *Neoro* fluvio, quem multis tamen in locis transcendit: a Connacia aliquamdiu *Sineo*, a Media suis limitibus terminata. Ptolemai ætate sedes erat *Brigantibus*, *Coriondis*, *Menapiis*, *Caucis* & *Blanis*, & ab his *Blanis* fortasse deducta & contracta illa recentiora nomina *Lein*, *Leinigh*, & *Leinster*. Fertilis & frugifera est terra, mitissimo Cælo, nec inclementibus Incolarum ingeniis. Distinguitur nunc in Comitatum *Wexford*, *Caterlogh*, *Kilkenny*, *Dublinensem*, *Kildariensem*, Comitatum *Regis*, Comitatum *Regina*, *Longford*, quibus *Fernes* & *Wicklo* nunc annumerantur. Hosce Comitatus jam ex ordine lustrabimus cum Camdeno, secundum populos quos hanc Hiberniæ partem habitasse scribit Cosmographus. *Brigantes* sederunt inter Suiri ostium, confluentesque *Neori* & *Barrowi*, qui *Birgus* Ptolemæo dicitur, sub urbe *Warrfordiæ*. Quædam exemplaria habent hos *Brigantes* dictos fuisse, quod si verum est, a *Birgo* flumine quod circumcolunt, nominatos fuisse ipsum nomen fere persuadeat. Inter *Neorum* & *Birgum* habitaverunt *Coriondi*, ubi nunc *Carloo*, sive *Caterlogh* Comitatus, & agri *Kilkennien*sis pars non minima, atque etiam ulterius ubi *Ossiria* Superior & *Ormondia* quæ Hibernicis *Urrown*, Anglis *Ormond*, & vulgo corruptissime *Wormewood*. Sub ostio Suiri *Menapii* tenuerunt promontorium ad *Lybonotum*, ubi nunc Comitatus *Weshfordiæ*, Hibernice *Connry Reogh*. Hoc ipsum promontorium *Hieron*, i. *Sacrum* vocat Ptolemæus, & eadem significatione ab Incolis etiam vocatum fuisse non dubitarim. Hujus enim extremum opidum ad quod Angli primam excensionem in hanc Insulam fecerunt, *Banna*, quod sacrum sonat, lingua patria vocarunt. Ab hoc sacro promontorio littus in Ortum obversum ad Septemtrionem longo tractu procurrit, cui vadosa objacent in mari loca navigantibus insidiosa, quæ nautæ *The grownds* vocant. *Cauci*, qui item gens erat maritima Germaniæ proxime *Menapios* habitaverunt, non eo intervalllo quo in Germania dissi. Horum fuit maritima illa regio, quam *O More*, & *O Brin* Hibernicæ familiæ incolunt, una cum Comitatu *Kildariensi*. *Kildariensis* Comitatus ager est latissimus, de cujus pascuis *Giraldus* illos *Virgili* versus usurpat:

Et quantum longis carpunt armenta diebus,

Exigua tantum gelidus ros nocte reponit.

Ultra *Caucos* egerunt *Eblani*, ubi nunc ager *Dublinensis*, & *Merh*, altera è quinque Hiberniæ portionibus. Comitatus vero *Dublinensis* ad mare est gleba fertili, pascuis latis, silvis autem ita nuda, ut cespites bituminoso,

vel